

**Date – 14/07/2024**

**Time - 7:30 -7:40Hrs**

## **REGIONAL NEWS BULLETIN**

### **HEADLINES (MORNING)**

1. Chief Minister Pu Lalduhoma leh Godrej Group President Rakesh Swami-a ten Mizorama Godrej Agrovet hmalak theihna turte an sawi dun.
2. Mizoram mamawh hrang hrang buaipuiin Supply Minister Pu B. Lalchhanzova chu kar kalta chung khan Delhi leh Kolkata-ah a zin.
3. Myanmar-a Oil leh bungrua thawn luh an dan mek chu sorkarin a hriatpui thu Central YLA chuan an sawi.

<><><>

### **CHIEF MINISTER**

Chief Minister Pu Lalduhoma leh Godrej Group President, Rakesh Swami-a te Mumbai-ah inkawmin, Mizorama Godrej Agrovet hmalak theihna tur te an sawi dun.

Bukvanneia an Oilpalm herna tihchangtlun chungchang te, Mizorama Godrej Samadhan Center kalpui ve thu te, Oil palm chîngtuten thlai dang - Sawhthing, Aieng, Hmarcha leh a remchang dang nena chin pawlha hlawk zawka hna an thawh theih dan tur te an sawi dun a.

Godrej Group President hian Mizoramah Sapthei sawngbawlina te, Sangha chi, leichi siam, Ar vulh, frozen food, Sahbon leh Glycerin thlenga a siamna an bun theih a beisei thu Chief Minister hnenah hian a lo sawi a. An hmalak theihna turte en turin a Group hnuaiia peng hrang hrang hruaitute nen August thlaah Mizoram rawn zin an tum thu a sawi a ni.

Chief Minister hian Mumbai-a a cham chung hian thil siam chhuahna hmun leh khawl nei lian tak tak te leh politician pawimawh te a remchan dan anga hmuh zel a tum a ni.

<><><>

### **SUPPLY MINISTER IN DELHI & KOLKATA**

Mizoram mamawh hrang hrang buaipuiin Supply Minister Pu B. Lalchhanzova chu kar kalta chung khan Delhi leh Kolkata-ah a zin.

Minister hi Union Minister for Consumer Affairs, Food and Public Distribution, Pralhad Joshi-a chennaah lengin National Food Security Act (NFSA) chungchang leh Consumer Welfare lama nasa zawka hmalak dan tur a sawipui a. Minister hian Mizoramah NFSA hnuaiia awm tur awm si lo engemaw zatte chu an

awm ve theih nana hmalakpui turin a ngen a. Department of Food and Public Distribution Secretary, Sanjeev Chopra-a leh Department of Consumer Affairs Secretary, Nidhi Khare-i te pawh hmuin Union Minister nena an inkawmna thute hi a bawhzui a. NFSA quota tihpun chu India ram puma Household Consumption Expenditure Survey data te uluk taka zirchian a nih hnua ngaihtuah that tur a nih thu leh, chu chu hun rei vak lovah hrual mum a nih a beiseiawm thu DFPD Secretary hian a sawi a.

Minister-in consumer awareness leh rights chungchangah hmun dang aia Mizorama consumer-te an inthlarun avangin a bik taka ngaihtuah an ngaih thu a sawi chu DOCA Secretary hian rawtna thehlut turin a lo rawn a ni.

Ministry of DoNER Secretary, Chanchal Singh-a pawh hmuin Land Revenue & Settlement Department tih changtlunna tur hrang hrang ruahmanna Mizoram sawrkarin a neih te chu tihhlawhtlin a nih theih nana theihtawp chhuahpui turin a sawm a. DoNER Secretary hian Minister thu thlente chu tha a tih thu leh tih hlawhtlin theih thilte an nih hlawm avangin proposal a luh hunah pawh a lo chhinchhiah tur thuin a chhang a ni.

Minister Pu B.Lalchhanzova hian Budge Budge, Kolkata-a Hindustan Petroleum Corporation Limited Oil terminal a tlawh bawk a. Minister chuan Mizorama hmasawmna tam tak thleng mek zelah tuialhthei mamawhna pawh a sang chho zel tih HPCL hotute chu a hrilh a. Petrol retail outlet tam zawk Mizorama bun belh tura ngenin khuarel chhiatna leh buaina dang a thlen thulha Mizorama tuialhthei stock a awm theih nana Oil Depot siam tura a lo sawipui tawh pawh HPLC lam hian a rang thei anga bera a hmun tur enfela hmalak thuai an tum thu an lo hrilh a ni.

(DIPR)

<><><>

#### CYMA

Central YMA chuan Cyclone Remal vanga chhiat tawkte tanpuina, hmun hrang hrang atanga a dawn khawm, Cheng Nuai 56 Sing 5 Sang 4 nimin khan Central YMA Hall-ah a sem chhuak.

He hunah hian chhiat tawh chungte engemawzat an kal a, hmun hla zawka awm - Lunglei, Serchhip, Saitual, Mamit leh Khawzawl Sub-Hqrs. hnuaia mite chu tanpuina thawn an ni.

<><><>

#### LAWNGTLAI

Thla hlui ni 24 atanga Central Young Lai Association-in dan kalha Rakhine State, Myanmar-a Oil leh bungrua thawn luh thin an dan chu an la chhunzawmzel a, Central YLA hruaitute chuan an thil tih chu sorkarin a hriatpui tih sawiin, ram chhung mipuite inhrek tumna a awm lo, an ti.

Lawngtlaia kan Corr., Lalnggheta Ralte chuan Lawngtlai daia Police leh YLA Duty Post tlawhin, he lai check post-ah hian Oil phur dan an awm lova, Myanmar a lut tura ngaih eichawp phur lirthei thenkhat erawh tangkhang a awm a ti.

Central YLA hruaitute chuan an thil tih chu ram chhung mite inhrek tumna a nilo tih an sawi nawn a. Siahaa dah tur Oil phurte chu an tlangtir zel tih an sawi a, filling Station thenkhat behchhana Oil phur, a dahna tur hmuna dah lova Myanmar ramri lam panpui an awm tawh thin vangin duty te chu an fimkhur hle niin an sawi a, mipui ta tur a ni tih hriatchian te erawh tangkhang an awm ngai lo, an ti.

Central YLA hruaitute chuan dan lova Rakhine state-a Oil leh thil dang thawn luh kawngah sorkarin a tih tur tha takin hlen se an duh ber tih an sawi a. Sorkarin a tih tur a tih chuan YLA tan rim taka thawka chet chhuah chu thil tul loah ngaiin an tawpsan mai tur thu an sawi.

<><><>

## CONGRESS

Mizoram Pradesh Congress Committee Sr. Vice President Pu Lalnunmawia Chuaungo chuan Aizawl khawpui laili atanga Assam Rifles sawnchhuah chungchang chu Mizoram leh mipui ngaihven tur bik a ni a, an chhuahsan kim dawn lo a nih chuan chhuak lo law law se, a ti.

Zitawpnia an party political session Congress Bhavana neihah thu sawiin Pu Lalnunmawia chuan, Union Home Minister-in Assam Rifles te sawnna tur MOU ziah tawh kar khat chhunga chinfel tum a nih thu a sawi chuan ngaihtuah a tithui, a ti a. Sawrkar hna a thawh ve laiin MOU Draft an thawn a, Central lam an ngawi hmiah a. Chutihlai chuan Central lamin MOU tur an siam ve a, ziakin an pe lo naa an duan dan chuan Loch House te, Quarter Guard leh Mandir te chhuahsan an tum lo niin a lang, a ti a. Mizoram sawrkar atang chuan reminder AR leh Ministry of Home te an thawn thin a, chhanna an hmu ngai lo, a ti.

<><><>

## NEPALI

Kolasib Diakkawn YMA Hall-ah Nepali Hnam thu leh hla chawikanga mite hriata puangzartu, Bhanu Bhakta Acharya piancham vawi 210-na nimin khan lawm a ni a, he hun hi Kolasib SP Pu David H. Lalthangliana'n a hmanpui.

Kolasib-a Bhanu Bhakta Acharya piancham lawmna hi Mizoram Gorkha Youth Association (MGYA), Kolasib Branch buatsaih a ni a; Pu David H. Lalthangliana chuan, Nepali te tana hun pawimawh tak hmanpui tura sawm a ni chu a lawmthu sawiin, Kolasib Branch MGYA ten an hnam tana mi pawimawh, Bhanu Bhakta Acharya chawimawina châng hriaa kum tin a piancham lawmna an buatsaih thei chu fakawm a tih thu a sawi.

SP chuan Gorkha hnam chu an awmna hmun apiangah mi dangte tana hnawksak an nih ngai loh thu leh an chenna hmuna ram leilung fate tana nelawm leh khawtlang leh ram tana mi tangkai tak ni thina a hriat thu sawiin hei hi chhunzawm zel turin a chah.

He hunah hian Bhanu Bhakta Acharya sulhnu thu leh hla leh hla- hril te pho lan a ni a, group zai, mal zai leh lam te entir a ni bawk.

<><><>

#### 4 CHILDREN DIED

Gujarat Sabarkantha-a Himmat Nagar Civil Hospital-a enkawl an nih lain naupang pali chu Chandipura virus kai nia rinhlelh vangin an thi a, naupang dang pahnih enkawl mek an ni. Heng naupang thisen sample te hi National Institute of Virology-ah finfiah turin thawn a ni tawh a, result nghah mek a ni.

State Health Department chuan Zirtawpni khan Gandhinagar-ah District hrang hrang - Sabarkantha, Arvalli, Kheda leh Mahisagar-a te Chandipura virus a darh dan an thirho a. Health Department Additional Director, RB Patel-a chuan hrileng laka invenna tur venhimna kalpui turin hrilenna district zawng zawngte a hriattir tih Akashvani a hrilh.

<><><>